



Lëtzebuerg, den 8. Mee 2024

Här President,

Esou wéi d'Chambersreglement et virgesäit, bieden ech lech, dës parlamentaresch Fro iwwert **Ännerunge bei den Zougangskrittäre fir den DAP Education** un den **Här Minister fir Educatioun, Kanner a Jugend** weiderzeleeden.

Den DAP (Diplôme d'aptitude professionnelle) Education ass eng nei Ausbildung, déi virun zwee Joer agefouert gouf an déi Hëllef soll, d'Penurie u qualifiziertem Personal an dësem wichtege Secteur ze bekämpfen. D'Aschreiwungszuele weisen, dass dës Offer op e groussen Zousproch bei de Jonke stéisst.

Eisen Informatiounen no gouf et d'lescht Woch eng Reunioun mat den Directricen an Direkteren aus de Lycéeën, wou si informéiert goufen, dass d'Zougangskrittäre fir den DAP Education (DP1ED) drastesch verännert ginn. Sou soll et an Zukunft just nach eng Klass pro Gebai ginn an d'Schüler*inne missten am Virfeld e Stage am edukative Beräich gemaach hu mat positiver Bewäertung. Doriwwer eraus missten d'Schüler*inne bis d'Päischtvakanz eng Lettre de motivation mat der Bewäertung vum Stage un de respektive Lycée schécken, fir no der Päischtvakanz eng Äntwert ze kréien. Fir déi aktuell ronn 500 Plazen fir den DAP Education ze erhalen, misste ganzer 25 Lycéeën eng Klass mat 20 Schüler*innen ubidden. Eisen Informatiounen no wäerten awer just 12 Lycéeën en offréieren.

Déi uewe genannte Changementer goufen, wann se sech da confirméieren, just e puer Schoulwoche virun der Summervakanz annoncéiert. Si wieren eng grouss Verännerung souwuel fir d'Schüler*innen, wéi fir d'Léierpersonal an d'Elteren. Dobäi ass d'Orientéierungsarbecht mat der Schüler*innen awer e Prozess, deen d'Enseignanten dat ganz Joer iwwer maachen. Donieft ass och nach ze bemierken dass, well den DAP Educatioun réischt virun zwee Joer agefouert gouf, et aktuell nach keng Absolvent*inne gëtt, unhand vun deenen een d'Formatioun kéint evaluéieren.

An dësem Kontext erlaben ech mer folgend Froen un den Här Minister ze stellen :

- 1. Kann de Minister déi genannte Changementer effektiv bestätegen, a kann hie confirméieren, dass se schon en vue vun der nächster Rentrée wäerten a Kraaft trieden?**
- 2. Wa jo, wéi a wéini plangt de Minister, deene verschidde Membere vun der Schoulcommunitéit dës Ännerungen ze erklären, virun allem wann dat a kuerzer Zäit muss geschéien?**
- 3. Wat sinn d'Grënn fir dës Ännerungen, a wat sinn d'Grënn dofir, dass se sou kuerzfristeg virum Enn vum Schouljoer agefouert goufen?**

4. Wéi vill Lycéeë wäerten den DAP Education d'nächst Schouljoer ubidden, a wéivill Plaze wäerten et ginn? Wäerten déi uewen ernimmte Changementer net viraussichtlech zu enger Reduktioun vun den Aschreiwungszuele féieren? Wa jo, steet dat net am Géigesaz zu de rezenten Aussoe vum Här Minister an der Press, dass d'Schülerzuelen an dësem Beräich solle konstant bleiwen?
5. Wat plangt de Minister fir déi Jonk ze maachen, déi dës nei Konditiounen an der kuerzer Zäit bis zum Enn vum Schouljoer net méi erfëlle kënnen?

Mat déiwem Respekt,



Meris SEHOVIC
Députéierten



Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 706 vum honorabelen Deputéierte Meris Sehovic

D'Zougangskrittären, fir op eng Klasse DP1ED ze kommen, goufe kengesfalls geännert. Dës sinn definéiert iwwer de *Règlement grand-ducal modifié du 14 juillet 2005 déterminant l'évaluation et la promotion des élèves de l'enseignement secondaire général et de l'enseignement secondaire classique*, an all Persoun, déi Accès op en DAP Kategorie A huet, däerf d'Formatioun zum Agent socio-pédagogique starten, wann si ee Lycée fënnt, deen se hëlt. Well an den leschte Joren den Undrang op dës Formatoun grouss war an sech ëmmer méi Persoune gemellt hu wéi Plazen do waren, huet all Lycée déi Schüler ausgewielt, déi am Beschten zum Profil vum Gebai gepasst hunn. Dëst ännert sech net par rapport zu den zwee leschte Joren.

Zwou Adaptatioune goufen awer virgeholl :

- a. D'Schüler, déi wëllen een DAP ED maachen, hunn sech dëst Joer musse bis de 24. Mee bei engem vun den 11 Lycéeën mellen an do hiren Dossier de Candidature erareeche (lettre de motivation, avis d'orientation provisoire, Zensuren, an eventuell Referenzen a Stagen). Et ass kengesfalls esou, wéi an der Fro formuléiert, datt d'Schüler hu missen eng positiv Bewäertung vun engem Stage ofginn fir eligibel ze sinn. Et steet als Eventualitéit um Communiqué mat drop, fir seng Méiglechkeeten ze verbesseren, fir eng Plaz ze kréien.

Dës méi fréi Prozedur gouf agefouert, fir datt méi Zäit bleift fir deene Schüler déi net ugeholl ginn eng Ënnerstëtzung an hirem Lycée virun der grousser Vakanz kënnen ze assuréiere bei der Sich no enger anerer Formatoun, déi si interesséiert. Et huet sech nämlech erweisen iwwer déi lescht zwee Joer, datt eng Hëllef bei der Neiorientéierung am August dacks schwierig ass.

- b. Fir ze evitéieren, datt Jonker eng Ausbildung maachen a risquéieren, duerno keng Aarbechtsplaz ze fannen, ass de Secteur vun de non-formale Bildungsstrukture gefrot ginn an den zoustännege Comité de pilotage gouf consultéiert. De Feedack war deen, datt d'Zuel vun de Schüler soll erofgesat ginn an un de Besoin ugepasst ginn, och fir genuch Stageplazen ze garantéieren. Doropshi gouf decidéiert, d'Kohorte liicht unzepassen fir sécherzagoen, datt kee Jonken an eng Sakgaass geschéckt gëtt, wou nom Diplom keng Aarbechtsplaz méi fräi ass. D'Upassung, déi dëst Joer virgeholl gouf, ass awer eng progressiv: Wann et richteg ass, datt am Schouljoer 2022/23, 507 Jonker an d'Formation initiale zougelooss goufen, sou koumen der d'lescht Joer just nach 385 derbäi. Do dernieft haten och 83 Apprentis adultes eng Léierplaz fonnt an hunn hir Léier ugefaangen. Fir 2024/25 wäerte ronn 300 Jonker kënnen an d'Formatioun starten; d'Zuel vun den Apprentis adultes ass net am Virus ze bestëmmen, well si fir d'éischt ee Patron mussen fannen, fir e Léiervertrag ofzeschléissen.

Deemno stëmmt et, datt lues a lues, an Ofstëmmung mam Secteur, d'Zuele vu Persounen, déi dës Formatoun kënnen maachen, un de Besoin ugepasst ginn.

Déi Jonk déi keng Plaz fannen, wäerten, dank der neier Prozedur, an de Lycéeën vun der Cellule d'orientation bei der Sich no enger anerer Formatioun ënnerstëtzt ginn. D'Beruffsausbildung bitt vill Méiglechkeete fir déi Jonk a manner Jonk, an an deene meeschten Secteure ginn dringend Leit gesicht.

Ee Secteur, dee ganz besonnesch an den nächste Joren wäert expandéieren a wou d'Aarbecht an d'Ausbildung och méi pedagogesch ausgeriicht ass, ass dee vun der Inclusioun. Beim Agent d'inclusion, deen aktuell op 43 Schüler begrenzt ass, wäerten dëst Joer Plaze fir ronn 200 Schüler an de Lycéeën disponibel sinn. Dës Formation mixte (dat heescht ënner Léiervertrag ab dem zweete Joer) ass staark un déi vum Agent socio-pédagogique ugeleent an huet vill Debouchéen (Haiser fir d'Betreiung vu Mënsche mat spezifesch Bedierfnesser, Foyeren, Centres de compétence, ESEB, asw.)

Ënnert dem Stréch kann een deemno soen, datt am sozio-pedagogesche Beräich um Niveau DAP d'Zuelen vun de Plazen an de Lycéeën net erof ginn, mee jee no Besoin op zwou Formatioune verdeelt sinn.

Lëtzebuerg, den 11. Juni 2024

De Minister fir Educatioun,
Kanner a Jugend

(s.) Claude MEISCH